

Neves da la Crousc Checena

Mauro Pederiva l'é stat nominà comissèr de la Crousc Checena de Fascia. A coordinèr la sentes de Vich e Moena sarà respetivamente Roberto Dorich e Francesco Sommavilla



Mauro Pederiva, nef comissèr de la Crousc Checena de Fascia.



Roberto Dorich, coordinador de la senta de Vich, a la Festa ta Mont.

Sozieta - Ai 23 de otober l'é stat na di de gran neves per la Crousc Checena de Fascia. Da Roma l'é ruà defat la nomina del comissèr, che dò la demiscions de Gilberto Bonani l cognarà portèr l Comitad de Fascia de la CRI enscin a la neva litazions del president, che sarà bonamenter l'uton che vegn. Tel medemo di l'é stat fat enche la litazions per nominèr i neves coordinadores, na neva fegura perveduda ades tel Trentin, olache l'é stat envià via n laboratorie sperimentèl per mudèr l'endrez de la Crousc Chécena, metan adum la desvaliva sezions che l'era dant te la "componenta unica".

I volontères de la Crousc Chécena de Fascia à lità desche coordinadores per la sentes de Vich e de Moena respetivamente Roberto Dorich e Francesco Sommavilla. La nomina del nef comissèr, ruèda diretamente da Roma, ge à enveze dat te man la rédenes de duta la Crousc Checena de Fascia a Mauro Pederiva da Poza.

Aon rejonà apontin con Mauro Pederiva, per saer vèlch de più de sia encèria e si programes, e soraldut per entener vèlch de più de la neva sperimentazion.

"Gio no é nesciun program – ne à dit subito Mauro Pederiva – ajache con chesta neva sperimentazion de la "componenta unica" l president, de chel che me é stat dat sù l ruol fin a le neve litazion, l cogn demò vardar de raprejentar la sociazion e gestir l'aspet economich. Sarà enveze l coordinador, chel che cognarà se confrontar e tegnir i raporc coi referenc de ogni setor, per arsegarar che dute le atività de le desvalive componente le vegne fat con maor e mior coordinament."

La "componenta unica" per

miorar coordinament e sinergia

Enscin ades, ne à spiegà Mauro Pederiva, la Crousc Checena la era fata de n muie de gropes: l'era i voluntadives del socors, i pionieres, l comitat de eles, i donatores de sanch e etres amò, e ogne grop portèa inant so lurier per so cont, senza n coordinament. Te duta la Tèlia l'era chièr che l'era besegn de strutturèr la robes a na maniera che sie maor sinergia, e coscita da Roma i ge à dat sù al Trentin, che l'é mingol l "fior sul corpet" te la protezion zivila nazionèla, de fèr chesta sperimentazion con la "componenta unica", per veder se l sistem podessa dapò vegnir slarià fora a nivel nazionèl.

La neva empostazion perveit macro arees de atività: sozio assistenzièla, sozio sanitàera, internazionèla, de la formazion: i setores sozio assistenzièl e internazionèl pel tor ite volontères dai 14 egn en sù, se sà ben dò la formazion perveduda, l setor sozio sanitàer tol ite volontères dai 18 egn en su. La desferenza anter volontères e pionieres vegn coscita descancelèda, l'é pervedù enveze n setor di joegn per i volontères dai 8 ai 24 egn.

L setor internazionèl se cruzia de derit internazionèl umanitàer, didamenc e intervenc foravia, misiones e projec, cooperazion con de altra organizacions e c.i.

L setor sozio sanitàer se cruzia del socors e del trasport de malé e ferii, de donazions de sanch, de slarièr fora le nozion e la formazion de prum aiut, de portèr inant azions de prevenzion e c.i.

Al setor sozio assistenzièl ge pervegn enveze soraldut de ge stèr dò a chi che se troa te na stenta,

dajan fora didamenc, fajan servije de acolienza d'invern e outra ativitàes sozièles e de assistenja, enche a nivel psicologich, anter l'auter enche con la formazion di clown "medicus comicus".

L setor de la formazion se cruzia de enjignèr corsc de basa per la comunanza e corsc specifichs de spezializacion te ogne area.

L setor di joegn pea via jà dai 8 egn con ativitàes de scola, jech, ciampes formatives, scontrèdes e c.i., per portèr inant i valores e i prinzipies de basa de la Crousc Chécena, dèr sostegn a la families e slarièr fora anter i più picoi e joegn l'informazion e la sensibilizacion sun temes desche la azetazion de chi che é desferenc, l'integrazion e la cultura de la pèsc; l'ambient e la vivibilità, l stil de vita, i raporc umans e l viver zivil; la nozion de prum aiut e i problemas de alimentazion e assunzion de sostanzes de dan.

Con chesta sperimentazion l'é stat pissà apontin a na struttura che ge permite ai voluntadives de fèr la pèrt olache i se sent più porté, ma con n coordinador che cogn "tegnir i fii" de l'atività de ogne setor, a na vida da poder razionalisèr e otimisèr i sforc e l lurier de vigniun, per no trèr demez scioldi e forzes.

Ge sporjon n bel developei a Mauro Pederiva per sia informazions, e ge auguron bon lurier a el, a Roberto Dorich e Francesco Sommavilla, e a duc i voluntadives, che te la Crousc Checena, ma enche te la Crousc Biencia, ti Studafech e te l'otra sociazions de voluntariat, i porta inant n lurier prezios per duta la comunanza. (lg)



L coordinador de Moena, Francesco Sommavilla, a la benediscion de la neva ambulanza.



Volontères de la Crousc Checena Val de Fascia.

"Per no perder temp!"

Scomenza "col bot" l'an de scontrade di gropes di joegn de Fascia

Sozieta - Sion part de n paisc, de na val, de na region... e amò no l'é dut! N messaje de universalità l'é chel che à avert l'an de scontrade di gropes di joegn de le piovanie de Fascia, che te le setemane passade à scomenzà via con bela gaissa soe desvalive neve atività.

Acà trei setemane, dò la paussa da d'istà, à tacà endodanef a se scontrar i gropes de ogne paisc, con proponete originale e aleggre da man di animatores: n jech matuscel o, perché no, na bona marena, l'é segur vide gustegole per scomenzar a star ensema, per proar a meter adum amicizie (chele co la A grana), strenjer valch bel leam, crescer mingol enche daite, de gra al confront con chi che se à apede ju. Facebook, l "Liber di musc", se sà ben, l'é la moda del moment: mostrignol, l'é ben sorì jir a curiosar su internet chel che combina i autres e, con n picol click, se far amisc de cent e cent persone! Ma en última, canche musc e storie se n'è vedù teis, se é endodanef soi, vindò n computer. Se dar jù e meter dant dut chel che se é dalbon, te n raport dret olache se à contat real co l'auter, l'é valch da bel, che no se cogn perder, che ge vel rencurar, con fadia, se sà ben, e reman de contra a la cultura d'aldidanché che fasc de dut per destacar le persone. A star coi joegn, bie vives, trasparenc e lumenousc, se veit aboncont che daite l bon ogneun i lo à, e che segur paa la speisa ge lurar dò a chesta semenza, per la far crescer e madurar!

Na "ciacia al tesor", donca, l mestier de animator, e na "ciacia al tesor" enche l jech endrezà enlongia le strade de Poza che enstadi à empieni ite la festa di gropes di joegn de dut l decanat de Fascia. l fredogn de chest mat meis de otober, l vent e beleche beleche enche na gratada de neif no i à volù menciàr al bel domesdi ensema, sparti anter football american, zità brasiliane da descoric, percorsc engatiè da far coi eies scuerc e piramide umane de meter ensema senza se engrumar un soraite l'auter: matitade no n'é mencià, e nience pa grignade de gust!

Con n bon té fers e na fieta de peta se se à segur sciudà e empieni ite l venter; te la Messa, enjignada con pascion e viventada con bele ciantie e orazion scempie e sinziere portade dant dai

joegn, se à podù viver n moment fon, fort e de segnificat. L decan, te la pardicia l'à rejonà de talenc, de se dar jù, de se spener percheche l temp e le calità che ogneun à a la leta i posse fiorir e portar fruc. Studiar, cognoscer, esser curiosc, jir dò a chel che se à daite, proar a realisar i ensomesc più gregn, cerir... L don del temp che se à l va desfrutà, per esser dalbon part ativa te la sozieta, ogneun a far chel che ge doventa miec! L Temp l'é stat enche l protagonist de la radunanza de duc i gropes di joegn del Trentin che l'é stat fat a Riva del Garda la setemana passada. Temp de sajon, temp metereolgich, temp mort, temp suplementar, temp da spet: na parola, l temp, che à n muie de desvalive doure, che fosc ge fasc perder so prum valor. "L'é dalbon ruà l Temp – à dit don Lauro, vicarie del piscop, te so descors ai joegn del Trentin – che i joegn cighe fora duta l'energia che i à daite, che i porte soa gaissa tel mond, che i dovente protagonisc de na vita te la verità, te la speranza, te la fe, tel servije, per se realisar enstesc e te soa comunanza". Dalbon possibol? Ei, basta l voler! Na storia, chela de chest an de scontrade e star adum, che à duta da esser scritta e dessegnada, ensema! L'é fort e fat col cher l'envit che duc i animatores ge sporc ai joegn de Fascia, percheche i tole part a le scontrade che ogne setemana i endreza, con chela de poder far, ensema, n picol ma emportant varech inant. Jeghes, mùsega, ciacole e enche mingol de orazion, per proar a troar la strada, a se sentir part de n projet e de n grop che laora per l medemo zil: esser duc contenc! Dalbon!

Thomas Zulian



I joegn de Fascia se à dassen godù a la festa con si animatores.